

**Zeitschrift:** Historischer Kalender, oder, Der hinkende Bot

**Band:** 305 (2022)

**Artikel:** Gartemusig

**Autor:** Hunziker, Ernst

**DOI:** <https://doi.org/10.5169/seals-953425>

### Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Siehe Rechtliche Hinweise.

### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. Voir Informations légales.

### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. See Legal notice.

**Download PDF:** 27.04.2025

**ETH-Bibliothek Zürich, E-Periodica, <https://www.e-periodica.ch>**

# Gartemusig

Text: Ernst Hunziker

Närvt öich o, we dir em Frytig Aabe,  
we me äntleche der Bruefsstress  
für guet zwe Tag chönnti hinder sech  
la, we me äntleche gmüetlech dörfti  
es Bier oder es Glas Wy gnähmige,  
ohni a nächscht Tag müesse z dänke,  
we me gmüetlech d Seel chönnti  
la bambele ... der Nachbar mit em  
Rasemäier über sys z lange Chrut  
freeset? Närvt öich das o?

Mii tuets! Gwaltig! Nid nume wils  
mir partout nid i Gring geit, warum  
me usgrächnet am Frytig Aabe mues  
der Rase schnyde. Nei, my Nachbar  
närvt nid nume wägem Rasemäie,  
sondern no vil meh wägem Rase-  
mäier.

Dä git nämlech nid öppe es  
einheitlechs, gradlinigs Grüüscher vo  
sech, wie das d Rasemäier gwöhnl-  
lech mache. Nei, d Tön göh uf u ab.  
Wie wen er zwüschyne zwenig  
Benzin überchiem. U de zwüschyne  
wider e Schluck chönnti ergattere.  
U o das natürlech nid regelmässig.

Zum Zuelose isch es närvfry-  
bend. Wil me - öb me wott oder  
nid - geng lost, öb er nächschtens  
hoffentlech absärblet, u de wider  
mues feschstelle, dass er älwä  
e Gutsch Moscht schynt gfunde z ha.  
Für glydruf z ghöre, dass dä Schluck  
glych nid wyt glängt het.

Es isch ja jetze nid eso, dass me  
wäge so öppisem di gueti Beziehig  
em Nachbar gägenüber wetti uf  
ds Spiel setze. Natürlech chönnt ig  
ihm ga sage, dass i sys Frytig-Aabe-  
Prozedere nid schetze. De würd ig  
aber vilich wyt meh verheie, als dass  
es würdi bringe. Drum bin i subtil  
a das Problem häre ggange.

Wil i sälber o ne Rase ha, han ig  
ne einisch gfragt, öb är Erfahrig heigi  
mit so Rase-Roboter. My Rasemäier  
tüejis älwä nümme so lang. Är rochli  
afe uf u ab u das chönnti doch de  
es Zeiche sy, dass däm sys Läbesändi  
nachi.

Erfahrig heigi är keni, het er gmeint, u im Momänt sygi das für ihn o no kes Thema. Sys Mäierli surri no schön u drum bruchi är ke Ersatz.

Obwohls o my Mäier no lang ta hätti, han ig mer e Rase-Roboter zuecheta. Es herrlechs Grät, sägen i öich. Mäit tadellos. Fasch lutlos. U de ersch no denn, wen i gar nid da bi. I ha ne ja eso programmiert. Dä Roboter stört jetze definitiv niemer.

U wil das eso gäbig geit, han i dänkt, i ladi my Nachbar einisch zumene Bierli y u zeigi ihm my nöischi Errungenschaft. Natürlech mit em Hindergedanke, ne ufe Gschmack z bringe, o so nes Maschinelni yzsetze. De hätt i über ds Wuchenänd myni Rueh un är hätti ersch no weniger Büez.

Der erscht Teil han ig ihm natürlech nid gseit. U bim zweite het er abgwunke. Für ihn sygi ds Rasemäie fasch wie ne Meditation. Är fahri hin u här, dänki a nüt, losi em Motor zue u derby chömi är i ne ganz spezielli Stimmig. Ds Surre vom Motor, das gmüetleche Uf u Ab, das nähmi ihm der Stress wäg. Fahri ihn ache. Butteli ihn i ne gmüetlechi Fyrabestimmig. Drum tüeji är der Rase konsequänt nume am Frytig Aabe mäie. Nachem Mäie sygi är bereit für ds Wuchenänd z gniesse, hocki sech häre u trinki gmüetlech es Glesli Wy. Nenei, so ne Rase-Roboter chömi ihm nid über d Schwelle. Dä gäbi ja kener Tön vo sech u das sygi doch längwylig.

I ha ihm du no gseit, dass er doch däm Roboter chönni zueluege. O daderzue chönnti me sicher meditiere. Är het der Chopf gschüttlet u gmeint, dass es d Tön syge, nid d Bewegige! D Tön würde ihm fähle! D Tön bringi ihn i ne schöni Frytig-Aabe-Stimmig.

Geschter bin ig mir ga Chopf-hörer choufe. I ha mer vorgno, jede Frytig Aabe mym Rase-Roboter zuezluege, derzue Chopin z lose u uf die Art gmüetlech ds Wuchenänd aazfa.



**Ernst (Aschi) Hunziker**, geboren 1955, ist im Simmental aufgewachsen und lebt in Matten bei Interlaken. Bis 2018 war er als Kommandant der Zivilschutzorganisation Jungfrau tätig. Er schreibt Mundartgeschichten, Romane, Krimis und Theaterstücke.